

II. Справа зъ Кереберды о проступствѣ одного чоловѣка Дмитра, жителя Керебердянского, который запомнѣвши боязнъ Божию, а маючи свою жону, зъ друую, челядницею пополнилъ грѣхъ телесный; аже тая справа въ книгу сию слово въ слово есть переписана, которая такъ ся въ собѣ маеть:

Мосці пане полковнику полтавский, нашъ милостивый пане и добродѣю!

Приточилася справа Богу мерская въ той мѣри, ижъ житель нашъ, именемъ Дмитро, невѣсту нанявши на рокъ, яко своей челядници изъ собою по пашню казалъ ехати, въ котрой дорожѣ запомнѣвши боязни Божои и встиду людского, мѣючи жону свою, зъ челядницею въ полю усиловне грѣхъ тѣлесный пополнилъ. Теды тая невѣста, ставши мовила, же тогожъ часу мѣламъ свою зневагу оповѣстити, аже Дмитро мовиль, якъ оповѣстишь, я худобою отбуду, а ты собою отбудешь; що не отпускаючи одъ себе тоей невѣсти, три месеци зъ нею чужоложилъ и такими словы тую невѣсту потѣшалъ: мѣлабъ еси въ собѣ отъ мене зачати, надаривши тебе въ инший городъ отвезу, албо самъ зъ дому отеду. Зачимъ чуючи мы ихъ Богу мерзское дѣло, казалисмо до вязения дати, и того чужоложника переписавши худобу, рейстръ вашой панской милости посилаемъ и о науку вашу милость, нашего милостивого пана и добродѣя, просимъ: що мѣмъ зъ тымъ чужоложникомъ поступити? О науку и повторе вашей милости, нашего милостивого пана и добродѣя, попросивши, въ милостивую ласку вашей панской милости отдаемъ ся. Зъ Кереберды, генъваря 22 дня, 1674 року. Вашей милости, нашему милостивому пану и добродѣви, во всемъ зычливые и слуги найныжшии Стефанъ Дорошевичъ сотникъ, Васко Набюкъ, атаман городовый.

По которой справѣ за проступство помененного Дмитра, жителя Керебердянского, зъ реестру худобы оного присланного отъ пана сотника Керебердянского, то сут до двора полковничого взято за вину: воловъ пять, лошака и ручницу зъ рогомъ; а сотникъ Керебердянский, зо всѣмъ тамошным урядомъ, зъ тогожъ рейстрику помененного проступци, за позволенемъ полковниковимъ, взяли быковъ два, овецъ двадцать и двѣ и жупанъ синий; а остатокъ худобы его, проступци, оставленъ его дѣтемъ. Що для памяти есть записано, року и месеца вышменованого, въ Полтавѣ. (Изъ кн. протоколовъ Полтав. полков. суда, л. 16 об.).